

## PRAKATA **PENGERUSI**



**ASSALAMUALAIKUM DAN SALAM SEJAHTERA.**

**A**lhamdulillah, syukur kepada Allah S.W.T kerana dengan limpah kurnia dan izin-Nya jua, Suruhanjaya Syarikat Malaysia (SSM) berjaya menempuh tahun 2022 dengan cemerlang serta melaksanakan tanggungjawab dan amanah dengan penuh dedikasi.

Tahniah dan syabas diucapkan kepada semua warga SSM yang terlibat dalam penerbitan Laporan Tahunan SSM 2022. Laporan Tahunan ini merupakan dokumen penting untuk merekodkan semua pencapaian serta aktiviti-aktiviti yang telah dilaksanakan sepanjang tahun dan sebagai rujukan semua pemegang taruh.

Tempoh dua (2) tahun negara dan seluruh dunia menghadapi krisis kesihatan dan ekonomi yang mencabar akibat pandemik COVID-19 tidak pernah melunturkan semangat warga kerja

SSM untuk mencapai prestasi yang cemerlang. Sesungguhnya, usaha gigih SSM untuk menyediakan ekosistem perniagaan dan korporat yang kondusif telah membuahkan hasil yang positif. Pelbagai transformasi telah dilaksanakan SSM, dari pembaharuan kerangka perundangan sehingga kepada penambahbaikan mutu perkhidmatan melalui transformasi pendigitalan sistem dalaman untuk manfaat semua pemegang-pemegang taruh SSM.

**Selari dengan aspirasi Kerajaan untuk meringankan beban komuniti korporat dalam fasa pemulihan ekonomi negara pada tahun 2022, KPDNHEP melalui SSM telah memperkenalkan satu (1) inisiatif baharu dan meneruskan lima (5) inisiatif yang telah diperkenalkan pada tahun 2021 dengan penambahbaikan yang signifikan.**

Bagi inisiatif pertama, SSM telah melaksanakan insentif pengurangan kompaun di bawah Akta Syarikat 1965 bermula 1 Mac hingga 31 Disember 2022. Di bawah inisiatif ini, syarikat dan pengarah syarikat layak mendapat pengurangan sehingga 90 peratus dari nilai asal kompaun bagi semua kompaun yang telah ditawarkan di bawah Akta Syarikat 1965.

SSM telah mengambil langkah ke hadapan bagi menyokong usaha dan inisiatif Kerajaan untuk memudah cara serta membantu pendaftaran perniagaan secara percuma melalui Skim Pendaftaran Perniagaan Prihatin (SPPP). Usaha ini adalah untuk membantu kelangsungan hidup rakyat dengan menceburi bidang perniagaan terutamanya golongan B40 dan pelajar institusi pengajian tinggi sepenuh masa. Pengenalan SPPP juga bertujuan membantu golongan B40 yang

terjejas pendapatan akibat pandemik COVID-19 dan pelajar sepenuh masa di institusi pengajian tinggi untuk mendaftarkan perniagaan mereka secara percuma melalui pengecualian fi pendaftaran dan cetakan maklumat perniagaan. Inisiatif SPPP ini juga akan memastikan golongan B40 menceburi bidang perniagaan secara sah di sisi undang-undang serta meningkatkan kepercayaan pembeli untuk berurusan dengan peniagaan yang sah.

SSM telah meneruskan pelaksanaan Skim 1 OKU 1 Perniagaan (S1O1P) yang menawarkan pendaftaran perniagaan dan pembaharuan pendaftaran perniagaan secara percuma kepada golongan kurang upaya untuk satu perniagaan. Inisiatif ini dilaksanakan sebagai galakan kepada golongan kurang upaya menceburi bidang perniagaan secara sah di sisi undang-undang di bawah Akta Pendaftaran Perniagaan 1956.

Seterusnya, SSM telah melanjutkan tempoh pendaftaran SSM BizTrust secara percuma sehingga 31 Disember 2022. Pendaftaran SSM BizTrust ini bertujuan untuk mewujudkan keyakinan pengguna, mendorong pematuhan entiti perniagaan terhadap keperluan perundangan serta memupuk persekitaran perniagaan dalam talian yang beretika.

**Selari dengan komitmen untuk menambah baik kerangka perundangan yang ditadbir secara berterusan, SSM sedang dalam proses memuktamadkan Rang Undang-Undang Syarikat (Pindaan) berkaitan Mekanisme Penyelamat Korporat dan Skim Kompromi Atau Perkiraan. Rang Undang-Undang Syarikat (Pindaan) ini bertujuan untuk memperkasa dan menambah baik kerangka perundangan sedia ada berkaitan rehabilitasi korporat untuk membantu syarikat-syarikat yang menghadapi masalah kewangan.**

SSM juga sedang dalam proses untuk memuktamadkan Rang Undang-Undang (RUU) Perkongsian Liabiliti Terhad (Pindaan) bagi memperkenalkan Mekanisme Penyelamat Korporat kepada entiti Perkongsian Liabiliti Terhad yang menghadapi masalah kewangan agar kekal beroperasi dan dapat menjaga ekonomi negara.

Kedua-dua RUU Syarikat (Pindaan) dan Perkongsian Liabiliti Terhad (Pindaan) ini masih dalam peringkat kelulusan oleh Bahagian Gubalan, Jabatan Peguam Negara dan dicadangkan untuk dibentangkan di Parlimen dalam sesi yang terdekat setelah mendapat kelulusan daripada Jabatan Peguam Negara.

Pada tahun 2022, SSM telah meneruskan Program Usahawan Muda 2022 (PUM22) dan Program Bimbingan Usahawan 2022 (PBU22). Matlamat kedua-dua program ini adalah untuk memberi kesedaran kepada kumpulan usahawan, belia dan pelajar institusi pengajian tinggi tentang keperluan mendaftarkan perniagaan. Ia juga dilaksanakan bagi menyampaikan maklumat berkenaan faedah-faedah yang diperolehi dengan mendaftarkan perniagaan mereka secara sah di SSM, berkongsi teknik-teknik menguruskan kewangan perniagaan dan pemasaran digital di samping memanfaatkan inisiatif Skim Pendaftaran Perniagaan Prihatin (SPPP) yang ditawarkan secara percuma oleh SSM. Golongan ini memainkan peranan penting dalam memupuk keusahawanan dan melengkapkan individu dengan pengetahuan dan sumber yang diperlukan untuk berkembang maju dalam landskap perniagaan. Inisiatif ini juga sejajar dengan Dasar Keusahawanan Nasional 2030 (DKN 2030) yang bertujuan untuk mempersiapkan Malaysia untuk menjadi sebuah negara keusahawanan menjelang tahun 2030.

Peranan SSM sebagai pengawal selia korporat tidak terhad di peringkat nasional sahaja, malah turut terlibat dalam pelbagai mesyuarat di peringkat antarabangsa. SSM telah menyertai Forum Pendaftar Korporat atau *Corporate Registers Forum (CRF) 2022* yang berlangsung pada 21 hingga 24 September 2022 di Republik Maldives. Forum anjuran *Ministry of Economic Development* ini memberi tumpuan kepada topik berkaitan pendaftaran korporat dan tadbir urus pada skala antarabangsa.

Forum tahun ini dianjurkan dengan tema "*Transforming Business Registries for the Post-Pandemic Era*" di mana SSM telah diberi penghormatan untuk membentangkan satu kertas bertajuk "*Beneficial Ownership Reporting Framework for Legal Persons in Malaysia.*" Penyeretaan

ini menekankan komitmen SSM untuk berkongsi pandangan dan bekerjasama dengan masyarakat antarabangsa dalam meningkatkan tadbir urus korporat dan kawal selia. Seterusnya, sebagai bukti penyertaan aktif SSM dan sumbangannya kepada CRF, Malaysia yang diwakili oleh SSM telah dipilih sebagai Ahli Jawatankuasa Eksekutif CRF untuk tempoh selama dua (2) tahun di mana YBhg. Datuk Nor Azimah Abdul Aziz, Ketua Pegawai Eksekutif SSM telah mewakili Malaysia. Pemilihan Malaysia sebagai Ahli Jawatankuasa Eksekutif CRF bagi kali keempat ini menandakan komitmen dan penglibatan berterusan dalam urusan pendaftaran korporat antarabangsa.

SSM juga telah menyertai Mesyuarat Ke-17, ASEAN *Task Force on Starting a Business* yang telah diadakan secara maya pada 13 Jun 2022. Penganjuran mesyuarat ini adalah bersempena dengan Mesyuarat Ketiga Belas ASEAN *Coordinating Committee on Micro, Small and Medium Enterprises (ACCMSME)*. Mesyuarat tersebut dihadiri oleh wakil-wakil agensi Perusahaan Kecil dan Sederhana (PKS) serta agensi-agensi pendaftaran perniagaan dan promosi pelaburan daripada ASEAN Member States (AMS) seperti Malaysia, Brunei Darussalam, Indonesia, Lao PDR, Singapura, Thailand dan Vietnam.

Selain itu, SSM juga telah menyertai Mesyuarat Pleno ke-24 Kumpulan Asia/ Pasifik (APG) mengenai Penggubahan Wang Haram yang telah diadakan pada 24 hingga 28 Julai 2022 di Kuala Lumpur. Mesyuarat tersebut telah dihadiri oleh wakil-wakil dari seluruh dunia dengan fokus terhadap jenayah kewangan serius yang memberi impak serantau dan dunia secara amnya.

Komitmen SSM menjangkau jauh melangkaui urusan pentadbiran, operasi dan penguatkuasaan. Organisasi ini secara aktif merangkul tanggungjawab yang lebih luas yang merangkumi kebajikan, tanggungjawab sosial korporat dan sokongan kepada komuniti. Pendekatan pelbagai aspek ini menggariskan dedikasi SSM untuk berkhidmat bukan sahaja sebagai badan kawal selia tetapi juga sebagai entiti yang bertanggungjawab dan prihatin dalam komuniti. SSM turut menyumbang kembali kepada masyarakat melalui pelbagai inisiatif pengagihan dana wakalah zakat korporat dan aktiviti tanggungjawab sosial korporat untuk membantu masyarakat termasuk warga kerja SSM.

**Pelaksanaan program-program tanggungjawab sosial korporat serta penyerahan agihan dana wakalah zakat korporat ini diharap dapat membantu meringankan beban golongan yang memerlukan serta meningkatkan pendapatan mereka. Pelbagai program kebajikan telah dilaksanakan termasuk projek agihan wakalah zakat korporat kepada usahawan asnaf, bantuan bencana banjir, sumbangan peralatan perubatan hospital dan lain-lain program yang telah dilaksanakan sepanjang tahun 2022.**

Saya berharap, SSM sebagai pengawal selia sektor korporat dan perniagaan akan terus mengekalkan prestasi yang baik ini pada masa akan datang. SSM kekal teguh sebagai satu pasukan di sebalik risiko akibat gangguan dan ketidaktentuan yang berterusan terutamanya pasca pemulihan ekonomi dunia.

Pada kesempatan ini, saya ingin merakamkan ucapan terima kasih kepada semua pemegang taruh dan Anggota-anggota Suruhanjaya atas sokongan, pandangan dan kerjasama yang diberikan. Ucapan terima kasih yang tidak terhingga juga kepada barisan Pengurusan Eksekutif serta warga kerja SSM atas dedikasi berterusan sepanjang tahun 2022. Semoga semangat kerjasama berpasukan ini akan diteruskan pada tahun-tahun mendatang dan memastikan kejayaan berterusan SSM yang memainkan peranan penting dalam mencorak landskap korporat dan perniagaan di negara ini.

Terima kasih.

**YBHG. DATUK AZMAN MOHD YUSOF**

Pengerusi  
Suruhanjaya Syarikat Malaysia